

Fute kale

Fita em Emisik

Bose Fut kale.

1 ¹ Nakunum kumel kunum waneng yutaka! Saimon Fita ne Yesus Kulais em kalan kunum kebi te. Nete fein ibolow so kunum waneng yukalem aneng koleweko, Fontus aneng fian e, Galesia aneng fian e, Kabadosia aneng fian e, Esia aneng fian e, Bitinia aneng fian e, ka ka uneko, kakin kuw biliw kunum waneng yulo fut kale boko, dabalayemi te. ² Sua sua kel akate, Aatim Sunbin-Got e akalem fukunin geleweko, yulo akalem wiin so amkoko, akalem Sunbin-Finik so galmose kunum waneng keyemse kasike, yu Yesus Kulais em weng afak bin kunum waneng keyemsomeliwi, e akalem kaim e yom dim songsong busel dayemeko, yom sili sili kukuw be ging koyemse te. Kaneyemse kunum waneng yulo “Yukal biliw yako!”, yangi te. Sunbin-Got em ibolow folok so, ibolow menew so be yulo kasi koyembomaka!^a

Sunsun Finik so Bin beem Kulomin Ding Fenbin em Weng te.

³ Alik nu nukalem Kamok Fian Yesus Kulais em Alew Sunbin-Got em wiin fian daolew kebomi, boluwka! Nimtew angom? E nulo ibolow kinkin keyemeko, Yesus Kulais elo fomkamin dim dawkalfolse beem deiw e kikis kunum waneng keyemsemi, num ibolow e dokoyemeko, yemkalfolbelei, nu diwkuw diwkuw kalaing kuw keko, ibik em sunsun finik so bin em kulokoluw beelo fenkabuluw te. ⁴ Yu kilele ibolow fukunina! Sunbin-Got e num abiil tikin em sunsun finik so bin kulokoluw kiloneko, sakokeko, alwol keko, nam banimoke eisneng be kilel atem alakabe te.^b ⁵ Nakunum kumel kunum waneng yutaka! Yu Sunbin-Got elo “Fein!”, dangbiliwi, e yulo akalem kitil fian so dokoyemeko, yetebe kasike, fefe ding kabalak

^a 1:2 Ulom 8:29; 2 Tesalonaika 2:13 ^b 1:4 Kolosi 1:12

e, yu Sunbin-Got em yom kuan kemin deiw kakabiliw em deiw gawsi goto okilewse beem dem e yukalem kiin so fein atemokoliw te.^c ⁶“Kane kulokoluw kai!”, angeko, kalfong so biliw kate kame, yom kawin dim kale kel kakabomi, kakin sukum ding buluw ding dim bakate, Sunbin-Got e yom dulum elote akalem ibolow fukunin kuw gelewskabe kasike, kawin dim kaleem kal anggил illum so, kak keyemeko, kiskis koyemkabe eisneng so, alik alik illum be yom dim akati talakabe te.^d ⁷Kaneyemkabe eisneng beem dulum be yu ^gol em fakam weng be ibolow fukunemoliwka! Kawtiw i gol kuluko, “Fein gol beni ba?”, angeko, kiskisko, fukabiliw te. Fuliw ete, fein gol kebe tewe, ais kaininba kekabe te. Nakunum kumel kunum waneng yutaka! Yom fein ibolow e gol elo bakilewskabe te. Kate gol emdiw, Sunbin-Got akalem ete yom fein ibolow beelo diwoko, “Be kitil yake? Beit yake?”, angeko, kal anggил illum so kiskis koyemkabe te. Yom Kulais elo “Fein!”, dangbiliw ibolow e fein kitil kebe tewe, beem dem e Yesus Kulais em iti kawin dim kale fitewoke ding dim bakate, i yulo yemsulsomi, yulo wiin fian so duyemsomeliwi, yu wangweng kunum waneng kebokoliw te.^e ⁸Yu kililina! Yu Yesus yukalem kiin so ateminba biliw kate, yu elo ibolow mutuk fian dulewkabiliw te. Kanebomeliwi, yu elo ateminba kebiliw kate, yu elo “Fein!”, dangeko, elo nanew kalfong elo bakilewoko, weng so ki keko, kilele bokolinba kebiliw kalfong atin kuw fian so kelewskabiliw bakate.^f ⁹Nimzew angom? Yom fein ibolow beem deiw kakabiliw em dem yu kuluko, sunsun finik so biliw kasike. Feinka! Sunbin-Got e yom kuankemin deiw be gawsi bul goto kelewoko, sunsun finik so bin em kulomin deiw busulse kasike.

¹⁰Nakunum kumel kunum waneng yutaka! Sua sua em ding dim bakate, Sunbin-Got em bontem dim bakamin kunum alik i Sunbin-Got em yulo ibolow folok kukuyemeko, kuan kemin deiw gawsi bul goto keloke deiw beem mongom em dulum elote bukesomi, kilele fenemaliw kale.^g ¹¹Fenbiliwi, Kulais em Sunbin-Finik e kunum biim mutuk tem kel ^Mesaya em betbet kuluko, kuaneko, iti wiin fian kuloke em sang bokoyemeko, ilo dolon keyembelei, i dakalalomeliw: “Nomin deiw ete o? Nal em tit ete, kaneko eisneng be fitewoke ya?”, angenaliw kale.^h ¹²Angenaliw kate, Sunbin-Got e ilo kukuyemei, i kal keliwete: Ikalem alenaliw ding dim kabalak e, im bakayemaliw weng be dem gilalinba keloke kate, ibik elote, yukalem biliw ding dim ete, im bakabiliw weng be fein dem gilaloke te. Keko kasike, kameem ding dim bakate, mali Sunbin-Got em Weng Kal Ken Ati be yulo bokoyemsiliw kunum waneng i yom fukun teleko, Sunbin-Got em abiil tikin elote dabalase Sunbin-

^c 1:5 Sion 10:28; 17:11 ^d 1:6 Sekow 1:2; 1 Fita 5:10 ^e 1:7 Ken Abin 17:3; Sekalaya 13:9; Malakai 3:3; Sekow 1:3 ^f 1:8 Sion 20:29; 2 Kolin 5:7 ^g 1:10 Matyu 13:16-17 ^h 1:11 Sim Fut 22; Aisaya 53; Iluk 24:26-27

Finik beem kitil e sang be yulo bokoyemsiliw bakate. Yutaka! Sunbin-Got em yemdakamin finik ikati yom kilisiliw weng be “Nu kal keluma o!”, angeko, ibolow danong angeko, deiw fenkabiliw te.

Tokotoko Keko, Bin em Weng te.

¹³Kaneko kasike, yu yom ibolow fukunin be memen keko, kilele kakamoliwka! Yu ibolow tem tem kesomi, kakamoliwka! Yu kilele kakabomi, kalaing kuw keko, Yesus Kulais em fitewko, yulo ibolow folok kukuyemoke em ding fenboliwka! ¹⁴Yutaka! Aul im auk aliwol im weng kiliko, im afak alakabiliw emdiw yukati Sunbin-Got em weng afak kakamoliwka! Yukalem suaem akokow keko, kakameliw ding dim bakate, yu yukalem kal anggил em “Kanelina! Kanelina!”, angenaliw kukuw wa bete kuw gelewemaliw te. Kate kame, yu kilelbi boliwka! Mesik esik yom kanemaliw kukuw be yulo iti bing yemde unemoke kasike!ⁱ ¹⁵Kate, yulo galmose tokotoko keyembe Sunbin-Got emdiw yukati yukalem kanebiliw kukuw alik alik beem dulum elote tokotoko keko, kakamoliwka!

¹⁶Nimtew angom? Sunbin-Got em fut ayem tem e bokolomele:

“Nakalem ete tokotoko keko, bi kasike, yukati tokotoko keko, boliwka!”

angse kale.^j

¹⁷Nakunum kumel kunum waneng yutaka! Yu Sunbin-Got elo “Aatim!”, dangakabuluw kate, yu kilele ibolow fukunemoliwka! E kawtiw alik alik im wiin fian so fong so be ateminba kebe kate, im kanekabiliw kukuw be kilele diwewo, geeyemboke Sunbin-Got ete te. Kaneyemoke kasike, yu kilelbiko, yom kawin dim kaleem kakin biliw ding dim bakate, yu em awan finganeko, wangweng kunum waneng kesomi, kakamoliwka!^k

¹⁸Nakunum kumel kunum waneng yutaka! Yukalem kaliwol kumel i yulo ikalem mongom banim kilele dokoyeminba kakameliw deiw kaleyemkabiliw kate, Sunbin-Got e yom kakameliw deiw beem yan wa be weneko, banim kelewso, kikis deiw mak wankeyemse te. Kate em weneko, banim kelewse yan be tum win ^gol so ^silba so, on kisol kilonin eisneng so weyeminba kese te. ¹⁹Kate, e akalem min elo ^siwsiw men sen banim so atite kuw emdiw kelewewo, akalem buselse kaim beem kitil nam beso yom sili sili kukuw beem yan be fein dukuse te.^l ²⁰Kawin so abiil so kale kilkeko, talfut kelinba be ding dim kabalak e, Sunbin-Got e Yesus Kulais elo galmoko, akalem wiin so amkose kale. Kate, yukalem gomet em dulum elote kameem fefe ding dim kabalak ete kuw, e kunum beelo dabalalei, e fein kawin dim kale kel fitewse te.^m ²¹Em kanese beem

ⁱ 1:14 Ulom 12:2; Efesus 2:3; 4:17-18 ^j 1:16 Kunum Ayem 11:44-45; 19:2; Matyu 5:48

^k 1:17 Ulom 2:11; Fitew Dase 2:23 ^l 1:19 Kalan Kunum 20:28; Kibulu 9:12-14

^m 1:20 Efesus 1:4

dem e kame yu Sunbin-Got elo “Fein!”, dangbiliw bakate. Sunbin-Got be Min beelo fomkamin dim dawkalfoleko, elo wiin fian dulewse kasike kame, yu ki keko, Sunbin-Got elo “Fein!”, dangeko, kalaing kuw kesomi, em yulo dokoyemomin ding fenkabiliw te.^a

²²Nakunum kumel kunum waneng yutaka! Yu Sunbin-Got em fein angse weng beelo gelewabiliw kasike, yom ibolow mutuk e Sunbin-Got em kiin dim e kais nam keloke te. Kelei, yu ki keko, mali ilo ibolow mutuk fian dulew dulew kukuw be fein keyemkabiliw te. Kasike kame, fein ibolow so kunum waneng ilo fein ibolow mutuk fian kuw dulew dulew keyemboliwka!^o ²³Num yem kumel i kawin dim kaleem kal so kun so yemkusiliw kate kame, Sunbin-Got em nam banimeko, finik so bin em weng e nulo yemku koyemin tew kelei, nu abiil tikin em kikis aul kebuluw te. ²⁴Finik so weng beem dulum elote Sunbin-Got em fut ayem tem bokolomele:

“Kawin dim kaleem kawtiw alik alik so, ikalem wiin fian so, alik alik bi ais bokbok gilalin atew keko,
balasal okiliwi, fulko, getkabe atew kesomi,
fein banimokoliw te.^p

²⁵Kate, Sunbin-Got em weng e nam alwol keko, nam banime te. E sunsun diwkuw diwkuw kuw boke te.”,
angse kale. Nam banime weng be yulo bakayem tem bakayem tem de talsiliw bakate.

Sunbin-Got em Angin Kebiliw em Sang te.

2 ¹Nakunum kumel kunum waneng yutaka! Kasike kame, yu alik alik mali ilo wa keyemomin ibolow kukuw e,
dasuw bokolew bokolew kukuw e,
fimdi famde kukuw e,
weng anyam kemin kukuw e,
on kelomi, ibolow mesem kelew kelew kemin kukuw e,
ibik weng bokolew bokolew kukuw e,
kukuw alik alik be kuluko, ibik elo kolew kemoliwka!^q ²Yu aul beliw im auk kumel im non wanomin ibolow donong danong kekabiliw atew kesomi, Sunbin-Got em yom finik elo kitil duyemkabe abiil tikin em weng ken ati beem wanin tew atew donong donong kebomi, fasuko, kitil keko, fian bamda makso makso kebomi, finik so sunsun bin em deiw kel kilele kakamoliwka! ³Nimtew angom? Yu Sunbin-Got em kukuw ken ati be kilele kiskiseko, fein atemsiliw kasike.^r

^a 1:21 Sion 14:6; Ulom 5:1-2 ^o 1:22 Sion 13:34; Ulom 12:10 ^p 1:24 Aisaya 40:6-8

^q 2:1 Efesus 4:22; Sekow 1:21 ^r 2:3 Sim Fut 34:8

⁴Kaneko kasike, yu Kulais em mit elo telemoliwka! E finik so am kun kitil nam ilkul atew^s kate, kal so kun so am gemin kawtiw i “Em aluwbamin banim! Sako!”, angomi, elo kulu fomdosiliw te. Kate, Sunbin-Got e am kun be sua sua kel akate galmoko, “Be atite kitil nam am kun te!”, dangse te. ⁵Dangse kasike, e yukati finik so am kun atew keyemeko, fein ibolow kunum waneng yulo akalem am ayem beem am kun galmoko, koyemeko, akalem am ayem gekabe te. Kate, yu kilele ibolow fukunina! Am ayem be kawtiw i teing so gelinba kekabiliw te. Feinka! E yulo akalem wiin so amkoko, akalem kunum ayem keyemse kasike, yukalem ken kiol kuw kukuw be Yesus Kulais em kanese beem mongom ete Sunbin-Got em kiin dim e aik ayem dim em kange eisneng emdiw kekabe te.^t ⁶Yesus Kulais em kanese beem dulum elote Sunbin-Got em fut ayem tem e fakam weng kale bokolomele:

“Ne tum mak nakalem wiin so amkoko, Saion^u abiw mutuk fian ka kel mo kolewsomelii, beem wiin so aluwbamin e tum kitil nam, atite emdiw keloki te. Kelii, nimin kunum waneng ite mak finik so tum beem mit mewso uneko, elo “Fein!”, dangiw tewe, i ikalem “Fein!”, dangbiliw ibolow beem dulum elote ibolow daking anginba kelokoliw te.”

angse kale.^v ⁷Kasike, Kulais elo “Fein!”, dangbiliw kunum waneng yom kiin dim e tum be ken ati keko, wiin so aluwbamin ken so tum ete te. Kate, mali “Fein!”, danginba kebiliw kawtiw im kiin dim e,

“Tum be ‘Em aluwbamin banim! Sako!’, angeko, elo sak kulu fomdo kolewsiliw te.

Kate, Sunbin-Got e tum be kuluko, ‘Emisik aluwbamin fian mak kelewbi te!’, angse kasike.”, angesomelei,^w ⁸iti bokolomele:

“Tum be im unomin deiw be deiwkim dim kulfilii belei, i elo kilele ateminba keleweko, unbomi, beem dim kel yan go keleweko, mit kuminkabiliw te.”

angse kale. Feinka! I Sunbin-Got em weng elo sakalaw keko, weng bo bo kelewkbiliw kasike, i tum beem dim e yan go keleweko, fom mitsiliw te. Sunbin-Got akalem ibolow fukunin gelewkbabe kasike, kaneko eisneng kawtiw biim dulum kaneyemkabe te.^x

⁹Kate, yukalem dulum elote yu weng kale kilele kililina! Yukalem mililiw mutuk kel kakameliw ding dim bakate, yulo gaayemeko, ailbin dim kakameliw kunum waneng keyemse Sunbin-Got be yulo

^s 2:4 Sim Fut 118:22 Fakam weng kale Gilik im weng sin so, Kibulu em weng sin so, kawtiw i tum kuluko, am gebiliw em sang bokoko, fut tem bosiliw kale. ^t 2:5 Efesus 2:21-22; Fitew Dase 1:6 ^u 2:6 Selusalem abiw mutuk fian em wiin mak e ‘Saion’ te.

^v 2:6 Aisaya 28:16; Efesus 2:20 ^w 2:7 Sim Fut 118:22 ^x 2:8 Aisaya 8:14-15

akalem wiin so amkoko, koyemse kunum waneng keyemsomi,
 wiin so kamokim kunum ayem keyemsomi,
 akalem bat kang kunum waneng keyemsomi,
 yulo akalem angin kunum waneng keyemse
 kasike kame, “Yu uneko, nem auk so kitil so eisneng kaleyemsi be mali
 kawtiw ilo ikati makso boko yak boko yak de unemoliwka!”, yangakabe
 te.^y

¹⁰ Sua e, yu sak wiin banim kawtiw keko, alenaliw te. Kate kame,
 Sunbin-Got e yulo akalem wiin so amko koyemse kunum waneng
 keyemse te.

Sua e, Sunbin-Got e yulo kinkin ibolow kukuw kukuyeminba kese
 kate kame, e yulo kinkin keyemeko, ibolow folok keyemse te.^z

¹¹ Nakunum kumel kunum waneng yu nem kitil weng kale kiliko,
 gelewomoliwka! Kawin dim kaleem kakabiliw ding kabalak e, yu
 kakin kokow kawtiw kebeliw kasike, yu kanelom yukalem kal dim em
 “Kanelina! Kanelina!”, yangakabe ibolow fukunin be gelewemokoliw
 te! Yu kilele ibolow fukunina! Yom kaneko ibolow fukunin wa be yom
 ken ibolow fukunin beelo alomin ibolow kesomi, eso gankabe kasike.^a

¹² Yu kawin dim kaleem kasel biim kiin dim e kilele wangweng keko,
 kutesomi, kakamoliwka! Yu im yulo weng miyembiliw be yan weng mak
 keyeminba kesomi, kilele kiol kuw kekakamiw tewe, ikati yom kaneliw
 kukuw be atemeko, Kulais em kawtiw ilo geeyemoke ding kabalak e, i
 Sunbin-Got em wiin fian daolew kemokoliw te.^b

Kak Yetebin Kawtiw im Afak Kakamin em Weng te.

¹³ Yu Kamok Fian em ibolow fukunin kuw gelewibiliw kasike,
 kawin dim kaleem kamok kebeliw kawtiw alik alik im afak kuw keko,
 boliwka! Kawin dim kaleem mesesem eisneng alik alik beelo atebe
 emisik kamok fian so,^c ¹⁴ akalem aneng aneng angom beem am dim
 “Ilo yetemina!”, yangse kamok iso, alik alik kamok biim weng afak
 keko, kakamoliwka! Nimtew angom? E aneng aneng yetebiliw kawtiw
 biilo aluwbamin fian mak duyemse kasike, i kukuw wa kebeliw kawtiw
 ilo yan wa dukayemsomi, kawtiw ken kukuw kebeliw kawtiw biim
 wiin e daoyembabiliw kasike. ¹⁵ Nimtew angom? Yu Sunbin-Got em
 ibolow fukunin gelewbomi, ken kukuw kuw keko, kilel kamok im
 afak kakabiliw kunum waneng keliw tewe, mali teifuluko, ibolow kou
 angebeliw kawtiw i yom kanebiliw kukuw be atemeko, weng gel mak
 nam bokoyemiw kasike.^d ¹⁶ Nakunum kumel kunum waneng yutaka!

^y 2:9 Sawa Weng 7:6; 14:2; Aisaya 9:2; Kalan Kunum 26:18; Efesus 5:8; Taitus 2:14

^z 2:10 Osea 2:23 ^a 2:11 Galesia 5:17,24 ^b 2:12 Matyu 5:16 ^c 2:13 Taitus 3:1

^d 2:15 1 Fita 3:16

Kulais em kanese beem mongom ete yu sawa weng beem afak binba kunum waneng kebilw kate, yu kanelom beem dulum elote dasuw weng bokoko, “Nu kame ki keko, nukalem ibolow kuw gelewoko, wa kukuw akal kemuma!”, angbokoliw te! Babo! Kate yu Sunbin-Got em weng afak kuw kakamoliwka! ¹⁷Kakabomeliwi, yu alik alik kawtiw ilo wangweng keyemboliwka! Yu fein ibolow so kawkunum kumel kunum waneng ilo ibolow mutuk fian dukayembomi, Sunbin-Got em awan finganbomi, kawin dim kaleem emisik kamok fian bakati wangweng kelewboliwka!^e

Yemtolo Unakabe Kunum Kulais em Sang te.

¹⁸Mali kawtiw im weng afak biliw sak kunum waneng yutaka! Yukalem ken falit yetebiliw kak kunum ikal, bingbung kekabiliw kak kunum ikal, kak yetebiliw kawtiw alik alik makuw im afak keko, ilo wangweng keyemboliwka!^f ¹⁹Nimtew angom? Yu Sunbin-Got em ibolow fukunin beem dulum elote “Nu im afak kebomi, kakamuma!”, angsoni, mali kawtiw im yulo sak betbet dukayembiliw ilum be sak daokemiw tewe, Sunbin-Got e yom kanebiliw kukuw be atemeko, kalfong keyemkabe kasike. ²⁰Kate, i yulo yukalem wa kukuw kebilw beem dulum elote geeyemeko, betbet yan wa mak dukayembiw tewe, kaneko be yukalem sen beem yan kasike, beem dulum elote yu yan ken mak nam kuliw te. Kate, yu ken kukuw kuw kesomi, Sunbin-Got em kiin dim e sen so banim kesomi, mali im yulo betbet duyembiliw betbet be sak daoliw tewe, Sunbin-Got e yulo yetemeko, yom wiin daoyemko, “Ken kawtiw yute te!”, yangoke te.^g ²¹Feinka! Sak betbet kuluko, daolewomin beem mongom ete Sunbin-Got e yulo akalem wiin so amkoko, koyemse te. Yu ibolow fukunina! Kulais e nukalem yemtolo unemakabe kunum kekabe te. Kasike kame, akalem num dulum elote sak betbet kuluse emdiw yukati mali ilo dokoyemomin beem mongom ete sak betbet kuluko, em emisik unse em deiw bakate yukati gelewko, kakamoliwka!^h ²²Yu em kanese kukuw be diw atemoliwka!

Kulais ete kuw fimdi famde weng mak kebomi,
sili sili kukuw gel mak kelinba kese te.ⁱ

²³Feinka! I elo weng milewsiliw kate, e ilo weng yan weng mak bokoyeminba kese te. Kesomelei, i elo betbet dulewsiliw kate, e ilo “Yom kaneliw beem betbet yan akati kulina!”, yanginba kese te. Kesomelei, e bokolomele: “Nakalem ete kawtiw biilo diwyemeko, kilele geeyemkabe Sunbin-Got akalem teing dim elo dali te!”, yangse te.^j ²⁴Kulais e nukalem sili sili kukuw beem ilum e akalem kal dim kel daoko, ais dim kuanomelei, nulo sok so emdiw net koyemse sili sili alik alik be

^e 2:17 Ulom 12:10 ^f 2:18 Efesus 6:5 ^g 2:20 1 Fita 3:14,17 ^h 2:21 Matyu 16:24; Sion 13:15 ⁱ 2:22 Aisaya 53:9 ^j 2:23 Aisaya 53:7; 1 Fita 3:9

silel kelewse kasike kame, nu ki keko, kiol kuw kukuw em deiw elo kakabuluw bakate. Feinka! Aliwi, em betbet kuluse beem mongom ete e yulo kilelyemeko, ken keyemse bakate.^k

²⁵Nakunum kumel kunum waneng yutaka! Sua kel akate, yu sak teifuluko, kakamelaliw ^siwsiw imdiw ke alenaliw kate kame, yu famdes teleko, yukalem ibolow elo kilele yetemeko, siwsiw yetebin kunum emdiw yulo kutebe kunum beem mit mewso talsiliw te.^l

Kais Yamkalel im Ken Abin Teinbin em Weng te.

3 ¹⁻²Kalel kumel yutaka! Yukati kimok kumel im afak kebomi, sak kiminin waneng keko, kilele ibolow kais kukuw kuw kesomi, wangweng kukuw kuw kemoliwka! Kebiliw kano, yukalem Sunbin-Got em weng elo sakalaw keko, weng bo bo kelewbiw kimok kumel i yom kanebiliw kukuw be atemsomeliwi, ikati ibolow famdes angbokoliw kasike.^m ³Yu kanelom sak kal dim em kait kelewbin ete kuw emisik kelewbomi, kak kon gulgul tiaktiak kelewbomi, kiol on kisol so minggisomi, ilim atite bete kuw sak minggiko, kait kelewokoliw te!ⁿ ⁴Kate, yukalem mutuk em nam banime menew kukuw so, falit angebin kukuw so bete kuw yukalem emisik kait kelewboliwka! Kukuw be Sunbin-Got em kiin dim e kait ken ati ete kasike. ⁵Yu kililina! Suaem Sunbin-Got em angin keko, kalaing kuw kesomi, em ding fen alenaliw waneng ikati beemdiw keko, imok kumel im afak bin kukuw be ikalem kait ken atite kelewbomi, alenaliw kale. ⁶Mak waneng mak u Sala ute te. U um imok Abalakam elo “Nem kamok kunum kutaka!”, dangeko, em weng afak kuw alenalu kale. Um kanemalu atew yukati kanesomi, fanganinba keko, ken kuw kukuw keliw tewe, yu Sala um fein mulkis kebokoliw te.^o

⁷Imok kumel yukati kilele kililina! Yukalem kalel kumel im kitil e fong kasike, iso kakabiliw ding kabalak e, yu im ibolow kilele fukuneko, kilele wangweng kukuw kuw keyemboliwka! Nimtew angom? Sunbin-Got e ikati ibolow folok duyemsomelei, i em sunsun finik so bin ken atite ati be nukalem emdiw fein kulokoliw kasike. Alik yu kaneko kukuw be fein gelewiw tewe, yom Sunbin-Got eso weng bakabiliw deiw be mesesem eisneng mak nam net keko, kasi koyemoke te.^p

Kiol Kuw Kukuw em Betbet Deimin em Weng te.

⁸Nakunum kumel kunum waneng yu nem fefe weng be kilele kililoliwka! Yukalem alik alik makuw

^k 2:24 Aisaya 53:5-6; Ulom 6:11 ^l 2:25 Esekiel 34:5-6; Matyu 9:36; Sion 10:14; Kibulu 13:20-21 ^m 3:1 Efesus 5:22 ⁿ 3:3 1 Timoti 2:9 ^o 3:6 Talfut Kese 18:12
^p 3:7 Efesus 5:25

ibolow ki kuw kebomi,
 kal anggил ilum kulubiliw kawtiw ilo kinkin keyembomi,
 fein ibolow so angin ilo fein ibolow mutuk dulew dulew keyembomi,
 ibolow folok kelew kelew keyembomi,
 menew ibolow falit angeko, boliwka!

⁹Mali kawtiw mak i yulo wa kukuw keyemiw tewe, yu kanelom ilo iti kukuw wa mak keyembokoliw te! Beemdiw, mali kawtiw mak i yulo weng miyemiw tewe, yu ilo kanelom iti weng miyembokoliw te! Kate, yu Sunbin-Got elo dakalasoni, “Ku ilo bamki so keyemoka!”, dangboliwka! Nimtew angom? Sunbin-Got e yulo gaayemeko, “Yukati ilo bamki so keyemoliwka!”, yangeko, yukati bamki so keyemoke kasike. ¹⁰Yu Sunbin-Got em fut ayem tem beem weng be atemeko kal kemoliwka! Weng be kanekote:

Nimin kawtiw ite mak finik so bin “Nu kuluma o!”, angbomi,
 ken abin akati “Kuluma!”, angbiw tewe,
 i kanelom weng anyam kebomi,
 foong fimdi famde kawtiw kemokoliw te!⁹

¹¹Kate i ibolow famdeko, kukuw wa ibik da kolewsomi,
 ken kukuw kuw kebomi,
 bukeko, mali kawtiw iso menew ibolow kukuw kuw kelew kelew kemoliwka!

¹²Nimtew angom? Kamok Fian em kiin e kiol kekabiliw kunum waneng ite yetem alakabe kasike.
 Kanekabiliw kawtiw bikalem weng beem dulum elote e akalem ken tem busuko, ilo kiliyemkabe te.

Kate, e wa kukuw kekabiliw kawtiw ilo maka keyemkabe te.

¹³Yu kilele kililina! Yu bukeko, kun kuluko, kukuw ken kuw kemiw tewe, mak kunum mak nam teleko, yom kanebiliw beem dulum elo fein wa keyemoke te. ¹⁴Kate, mali kawtiw i yom kiol kukuw kebiliw beem kokmen elote anggил ilum mak dukayembiw tewe, yu Sunbin-Got em yulo duyemoke yan ken fukuneko, kalfongeko, kakatemoliwka! Yu kanelom mali im finganbiliw eisneng so, im yulo kaneyemokoliw beem dulum beso, teifuluko, finganemokoliw te!¹⁵Kate, yom ibolow tem em abin e Kulais elo kuw dulewoko, elo yukalem ibolow tem em Kamok Fian kelewoko, elo kuw wangwang kelewboliwka! Kaneyembomeliwi, mali kawtiw mak i yulo geeyemin weng mak dakalalomeliw: “Yu fein ibolow kawtiw kebiliw kasike, yu nomin eisneng mak elo ‘Ibik ete kulukoluw kai!’, angbiliw a?”, yangeko, yulo dakalaliw tewe, yu diwkuw diwkuw memen keko, ki kesomi, ilo kilele yan weng bakayemboliwka! ¹⁶Kate, yom ilo yan weng bokoyemiw ding dim bakate, yu ilo kilele ibolow menew falit keyemsomi, wangweng weng

⁹ 3:10 Sim Fut 34:12-16 ¹³ 3:14 Aisaya 8:12-13; Matyu 5:10; 1 Fita 2:20; 4:14

kuw bakayemboliwka! Bokoyemsomeliwi, yu kilelbiko, yom ibolow fukunin beem dulum elote “Nu sen so banim keko, Sunbin-Got eso ibolow ki makmak weng kuw bokoyemuma!” angboliwka! Kaneliw tewe, yulo diwyemeko, geeyembiliw kawtiw i yom Kulais em afak bin kakabiliw deiw ken ati beem kukuw atemeko, ikalem ete inkal kuluko, weng banim kemokoliw te.^s ¹⁷Yu kililina! Sunbin-Got akalem ibolow geleweko, num dulum elote “Kaneko anggил illum deimina!”, yangoke kasike, nu fein kal anggил illum mak kuluw tewe, nu “Kenka!”, angeko, ibolow menew kuw keboluwka! Kate, nu wa kukuw gelew kabuluw beem dulum elote kal anggил illum mak kuluw tewe, be atin kuw wa te.

¹⁸Yu Kulais em kanese be ibolow fukunemoliwka! E Sunbin-Got em kiin dim e sen so banim kunum kese kate, e sili sili nam kunum waneng num sen beem dulum elote, makmak ding kuw betbet fian kuluko, ais dim kel kuanse te. Em kanese deiw bete, e yulo yemdeko, Sunbin-Got em mit mewso keyemse te. Feinka! E kawin dim kaleem kal so kun so kunum awet kesomi, kuanse kate, Sunbin-Finik e elo iti dawkal fole te. ¹⁹Dawkalfolei, e uneko, sok am tem kel ding fenbiliw kuansiliw finik^t im mit elo uneko, ilo akalem kanese eisneng beem weng bakayem unse te. ²⁰Sawkal biim dulum elote suaem Noa em ^siw gese ding kabalak e, Sunbin-Got e kawtiw biim ding feneko, “I nelo ‘Fein!’, nangokoliw sako?”, anse kate, kawtiw demdem bi elo sakalaw keko, weng bo bo kelewsomeliwi, fong kunum waneng duan kel kawtiw ite kuw siw tem kawtem unsiliw kasike, ok fole fole telse be ilo yeninba kese kate, Sunbin-Got e ilo fein dokoyemei, ok be ilo ken abin kulomin dim elo iti yemde unse kale.” ²¹Kanese be yukalem ok da koyemkabiliw beem kiskiw ete te. Mali i kal ninik gingomin beem dulum elote yulo ok da koyeminba kekabiliw kate, ok unemin beem kiskiw e, yu Sunbin-Got elo bokolewomeliw: “Ku nulo sen so banim keyemeko, kukalem ibolow so ki makmak keyema!”, dangsiliw te. Dangiwi, Sunbin-Got e Kulais em dawkal fole beem kitil e yukati sunsun finik so bin kulomin beem deiw kel mo koyemse te. ²²Feinka! Kulais e iti baba teineko, abiil tikin kawtem uneko, Sunbin-Got em auk so yuk teing dim kel teinkabe te. Teinbelei, yemdakamin finik i, auk so kitil so wiin fian so finik i, alik alik bi em afak kuw keko, biliw te.

Suaem Kukuw Kolewsomi, Alwol Kemin em Weng te.

4 ¹Nakunum kumel kunum waneng yutaka! Kaneko kasike, Kulais em ibolow fukunin emdiw yukati aluwboliwka! E kal illum kuluko,

^s **3:16** 1 Fita 2:12 ^t 3:19 Kal kawtiw i “kuansiliw finik” beem mongom amen amen kuw bakameliw te. Mak i “Sunbin-Got elo sakalaw keko, weng bo bo kelewsiliw yemdakamin finik ite te.”, angakabiliw te. Mak i bokolomeliw: “Kuaneko, sawkal am tem kel Sunbin-Got em geeyemin ding fenkabiliw kawtiw im finik ite te!”, angakabiliw te. Iti mak i bokolomeliw: “Noa em ding dim kabalak e, Sunbin-Got e finik biilo sok am tem da koyemse te.”, angakabiliw te. ^u **3:20** Talfut Kese 6:1–7:24

kuanse kasike, yukati em kanese atew keko, memen kebomi, kal ilum daokemoliwka! Daoliw tewe, sili sili nam kukuw beem deiw akal atin kuw kolewboliwka!² Keko kasike, yom kal so kun so biliw dim bakate, yu Sunbin-Got em ibolow fukunin ete kuw gelewibomi, suaem kal anggил dim em “Kanelina! Kanelina!”, yangeko, silikmoyemkabe deiw be atin kuw kolew kemoliwka!³ Nimtew angom? Sua e, yukati Isalael kawtiw num ibik biliw kawtiw biim kakameliw deiw be gelewemaliw kate kame, yu kanemaliw kukuw be ki kebeliw bakate. Biim kukuw e kanekote:

Mak min so kaing so im kanekabiliw emdiw kemin e,
mak e wa eisneng elo ibolow kelewbin e,
mak e ^wain ok banso waneko, mamtel kemin e,
mak e bonggusomi, wanin so ok so fian sel kuw wansomi, teifulubin ibolow e,

mak e, Sunbin-Got em sawa weng sakalaw keko, weng bo bo kesomi, dasuw god im mit mewso keko, im wiin daoyem kemin ete te.^w

⁴Sua kel e, yu kaneko kukuw bakati iso makuw gelewemaliw kate kame, yu im kukuw be kolewsiliw kasike, i yom ken kukuw gelewibiliw be yetemeko, yol angesomi, yulo weng miyemeko, yom wiin elo de mit da koyemkabiliw te. ⁵Kate, kuansiliw so, daso biliw so, alik alik makuw diwyemeko, ilo geeyemomin memen kebe Sunbin-Got be im kanemaliw kukuw be fein diwyemoke kasike, i ikalem kanemaliw kukuw beem mongom e kilele silel bokolewokolow te.^x ⁶Kaneko kasike, kuansiliw kawtiw ikati Sunbin-Got em Weng Kal Ken Ati be kilisomeliwi, mali ikal elo “Fein!”, dangsiliw te. Feinka! Sunbin-Got e biim kal anggил elo geeyemse kasike, i kawtiw imdiw kuansiliw kate, biim finik e Sunbin-Got eso bomi, sunsun finik so alakabiliw te.

Sunbin-Got em Deiwkim kel Kakamin em Weng te.

⁷Nakunum kumel kunum waneng yutaka! Kame, alik alik mesesem angom kale banimomin mewso ding kebe kasike, yukalem Sunbin-Got eso weng bakabiliw ding dim e, yu ibolow tem tem kesomi, kilele ibolow fukuneko, kakamoliwka!^y ⁸Kakabomeliwi, emisik e, yu mali kunum waneng ilo ibolow mutuk fian kukuw keyemboliwka! Nimtew angom? Ibolow mutuk keyembin kukuw e mali im nulo kukuyembiliw sili sili nam kukuw demdem beelo sak kasi koyemkabe kasike.^z ⁹Yu kanelom mali yom am teliw kakin kawtiw biilo gal keyemko, weng tal weng bakayem bokoliw te! Kate yukalem am elo yemde unemoliwka!^a

¹⁰Sunbin-Got e yulo ibolow folok keyemeko, alik alik yulo Sunbin-Finik em bamki kitil eisneng banban mak amen amen kuw duyemkabe kasike

^v 4:1 Ulom 6:2,7 ^w 4:3 Efesus 2:2-3 ^x 4:5 Kalan Kunum 10:42 ^y 4:7 Ulom 13:11-12

^z 4:8 1 Fita 1:22 ^a 4:9 Kibulu 13:2

kame, yukati ken aluwbamin kunum waneng kesomi, yom kulukabiliw eisenng beso mali kunum waneng ilo sak misim kuw dokolew dokolew kukuw kukuyemboliwka!^b ¹¹Keko kasike, nimin kawtiw ite mak Sunbin-Got em weng bakamin em aluwbamin auliw tewe, i Sunbin-Got em bontem dim kuw bakamin kawtiw kemoliwka! Beemdiw, nimin kunum waneng ite mak mali ilo dokoyemomin ibolow keliw tewe, i Sunbin-Got em kitil duyemkabe beso mali ilo dakayemboliwka! Dakayembeliwi, yu Yesus Kulais em wiin dim e kaneliw tewe, Sunbin-Got e beam dulum elote wiin fian kuloke kasike. Kitil so auk so, angom alik alik so, wiin fian so bin beso, diwkuw diwkuw Sunbin-Got akalem dulum elote kuw alakabe te. Feinka!

Fein Ibolow so Kawtiw im Kal Anggil Ilum Deimin em Weng te.

¹²Nakunum kumel kunum waneng yutaka! Anggil ilum ais dong mamin nam atew mak yulo kak keyemomin teleko, silit keyeme tewe, yu kanelom yol angeko, “Kaneko eisenng kale nomin eisenng a?”, angbokoliw te! ¹³Kate yu ibolow fukuniwete: Kaneko ilum be Kulais em daose ilum emdiw kasike, yu kal anggil ilum be deimsomi, kalfongeko, boliwka! Nimtew angom? Kulais em iti kawin dim kale telesomelei, em auk so kitil so be kilele fitewoke ding dim e, yukati kakat fian keko, bokoliw kasike.^c ¹⁴Yu Kulais em angin kebiliwi, mali kawtiw i beam mongom ete yulo desi keyembomi, boktak weng geeyembiw tewe, yu Sunbin-Got em yulo duyemoke yan ken fukuneko, kalfongeko, kakatemoliwka! Nimtew angom? Sunbin-Got em Sunbin-Finik kitil so auk so be yulo kasi koyem alakabe kasike.^d ¹⁵Kate yu kilelbi boliwka! Mesik esik mali geeyemin kawtiw i yom mali ilo yeniw beam sen e, yom yakut keliw beam sen e, yom kukuw wa keliw beam sen e, yom mali mesem eisenng keliw beam sen e yulo betbet dukayembokoliw kasike. ¹⁶Kate nimin kunum waneng ite mak Kulais em angin kebiliw angomi, mali kawtiw isik betbet dukayemiw tewe, yu kanelom beam dulum elo beit keko, inkal kemokoliw te! Yu Kulais em angin kebiliw kasike, yu kitil keko, Sunbin-Got em wiin fian daolew kemoliwka! ¹⁷Sunbin-Got em kawtiw alik alik diwyemeko, geeyemoke ding kame mewso kebe te. Kesomelei, emisik e, e akalem angin nulo fein diwyemoke te. Kate yu kilele ibolow fukuneko, boliwka! Akalem fein angin nulo akati diwyeme tewe, Sunbin-Got em Weng Kal Ken Ati beelo sakalaw keko, weng bo bo kelewabiliw kawtiw i nono kelokoliw a? Im kal anggil kulokoliw ilum beam kolewomin deiw mak banim kasike. ¹⁸Feinka! Sunbin-Got beam dulum elote bokolomele:

^b 4:10-11 Ulom 12:6-8 ^c 4:13 Kalan Kunum 5:41; Sekow 1:2; 1 Fita 1:6-7

^d 4:14 1 Fita 2:20

“Kiol kuw kukuw kekabiliw kunum waneng ilo finik so deiw kel mo koyemomin em deiw mak mewso banim kese te.

Kese kasike, wa kukuw kesomi, Sunbin-Got elo sakalaw keko, weng bo bo kelewkabiliw kawtiw biim dulum elote nono kesom ete, ilo dokoyemoke ya?”,

angse kale.^e ¹⁹Kaneko kasike, Sunbin-Got e akalem ibolow fukunin geleweko, mali kunum waneng im dulum elote “Yu ki keko, ilo kal anggил ilum deimina!”, yangbe tewe, i anggил ilum be daoko, yukalem duku koyemse kilele yetebe Sunbin-Got elo “Kom teing dim alakabuluw te!”, dangeko, diwkuw diwkuw ken kukuw kuw gelewbomi, boliwka!

Kak Keko, Yetebiliw Kunum im Weng te.

5 ¹Kame, yom mutuk biliw nakalem diw sios im kak yetebiliw kunum yulo weng kale bokoyemi te. Ne nakalem kiin so Kulais em betbet kulse be atemsi te. Kaneko kasike, em iti auk so kitil so, wiin fian so toloke ding dim e, neso yuso makuw bongguko, eso bokoluw te. Kasike kame, yu nem kitil weng kale kilele kililoliwka! ²Yutaka! Sunbin-Got e akalem kunum waneng yom teing dim da koyemeko, “Ilo ^siwsiw men em diw kilele keyemboliwka!”, yangse kasike, yu kanelom fukunomeliw “Tbo! I nelo aluw bamin beem dulum elote mo konemsiliw kai!”, angomi, ibolow ilum kemokoliw te! Kate, yu Sunbin-Got em ibolow fukunin be geleweko, kalfongeko, aluw bamin be kitil kuw aluw bamoliwka! Fein! Yu kanelom yan kulamomin beem dulum elote kuw ibolow fukuneko, aluw bamokoliw te! Kate, yu “Mali im fein ibolow dokoyemo yo!”, angeko, aluw baboliwka!^f ³Yusik kanelom wiin so kunum atew kebomi, mali yom teing dim biliw kunum waneng biilo de mit da koyem kemokoliw te! Babo! Kate, yu im yamtoloko, unemin kunum kebiliw kasike, i yulo yetemeko, fein yenggelemiw te!^g ⁴Yu kanemiw tewe, emisik siwsiw yetebin kak kunum beem toloke ding dim e, yu nam banime yan mak kuluko, eso akalem auk so mutuk dim ka kel bokoliw te.

Tanbelel im Weng te.

⁵Tanbelel kunum waneng yukati kak keko, yetebiliw kunum im afak keko, boliwka!

Alik alik yu yukalem de mit dako, ibolow falit kunum waneng kemoliwka! Nimtew angom?

“Sunbin-Got e kawtiw ikalem wiin doaliw kawtiw ilo de mit da koyemkabe kate, mali ikalem wiin de mit daliw kunum waneng im wiin e fein daoyemkabe te.”,

^e 4:18 Ken Abin 11:31 ^f 5:2 Sion 21:15-17; Kalan Kunum 20:28 ^g 5:3 2 Kolin 1:24; Filibai 3:17; Taitus 2:7

angse kasike.^h ⁶Keko kasike, nomin ilum eisneng mak yom dim tele tewe, yu falit ibolow angeko, yukalem ete de mit dabomi, yukalem ete Sunbin-Got em teing kitil beem afak kel duku kemoliwka! Kemiw tewe, Sunbin-Got em kiin dim em ken ding keloke ding kabalak e, e yom wiin dao keyemoke te.ⁱ

⁷Keko kasike, yom sakik ibolow alikum be Sunbin-Got em teing dim kuw dakamoliwka! Nimtew angom? E yom sakik be kuluko, yulo kilelbi yetem alakabe kasike.^j

⁸Kaneko kasike, yukati kilelbiko, kuteboliwka! Nimtew angom? Yom maka Seten-Ataanim e ^alaion em samal an wanomin tew donong donong keko, gaaneko, fenkabe atew kebe kasike.^k ⁹Kate, em kanebe dulum be yukalem fein ibolow be kanelom beit kemokoliw te! Yu kitil kuw keko, mo kemoliwka! Nimtew angom? Yu kal keliwete: Yom fein ibolow so kawkunum kumel aneng aneng angom biliw bikati yom kal ilum deibiliw beemdiw kekabiliw kasike.^l ¹⁰Yu kilele ibolow fukunemoliwka! Ibolow folok keyembin em mongom kayak Sunbin-Got e yulo akalem wiin so amkoko, Kulais em kanese beem mongom ete akalem auk so kitil so sunsun alakabe dim elo da koyemoke te. Feinka! Kame, yu sukum ding kebomeliwi, kal anggil ilum deibiliw kate, e yulo atin kuw kiol keyemsomi, yulo abin kitil dim kel mo koyemsomi, yom fein ibolow elo kitil kuw keyemsomi, yulo fein kitil kuw mo koyemoke te. ¹¹Kitil so auk so, angom alik alik be diwkuw diwkuw Sunbin-Got akalem dulum elote kuw alakabe te. Feinka!

Fefe Weng te.

¹²Nakunum kumel kunum waneng yutaka! Nukalem nakunum fein ibolow so kunum Sailas e nelo dokonemei, ne yom ibolow fukunbomi, fut sukum gel kale bosu te. Nimtew angom? “Yu Sunbin-Got em fut tem kel boli ibolow folok sang kale atemsomi, kilele kal keko, yom fein ibolow be kitil kuw keko, boliwka!”, yangbi kasike.^m

¹³Sunbin-Got em Babilonⁿ abiw mutuk fian kale kel yukalem diw galmoose sios kunum waneng i yulo “Yukalo!”, yangiw te. Nem min atew kebe kunum Mak akati “Yukalo!”, yange te.^o

¹⁴Alik alik yu Sunbin-Got em angin num kukuw keko, yukalem ibolow mutuk so dulew dulew kebomi, falal kolew kolew kemin kukuw kebomi, “Mona! Weya!”, ange ange keboliwka!

Kulais em angin kebiliw kunum waneng yutaka! Ibolow menew kukuw e yom mutuk kel bomaka!

Bete kuw. Nem fut weng boyemi fut kame kilaka.

^h 5:5 Ken Abin 3:34; Efesus 5:21; Sekow 4:6 ⁱ 5:6 Matyu 23:12; Iluk 14:11; Sekow 4:10

^j 5:7 Matyu 6:25-30 ^k 5:8 1 Tesalonaika 5:6 ^l 5:9 Efesus 6:11-13; Sekow 4:7

^m 5:12 Kalan Kunum 12:2,25; 13:13; 15:22,37-40 ⁿ 5:13 Babilon be Ulom abiw mutuk fian em kiskiw wiin ete te. ^o 5:13 2 Timoti 4:11